



Aqqalu C. Jerimiassen

UPA 2022/105-1

Atassut

10. Maj 2022

**Oqaatsuni oqaluffiliornissaq siunertaralugu sanaartornissamut pilersaarummik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Doris Jakobsen Jensen, Siumut)

Ilagiittut Lutherikkutut inuiaqatigiinni anersaakkut perorsagaanerpup ulluinnarni inuunitsinnut naleqartitatsinnullu annertuumik nippugunnikuuvoq.

Upperisarsiornikkulli inuiaqatigiinni kristumiutut ilagiittut maanna ulluinnagut ukiuni 50-ini kingumut qiviassagaanni qaffariartorsimanngitsoq malunnartarpoq.

Inoqarfinni arlalippassuarni maanna ajoraluartumik oqaluffiit suliassaalluinnalersimasut takuneqarsinnaalersimavoq, ukiunilu kingullerni ajoraluartumik oqaluffeqarnikkut aaqqissuussisarnerit tunullinneqakkajussimasut nassuerutigineqaannartariaqarluni.

Atassummiit isumaqarpugut, inuiaqatigiit anersaakkut nukittuut tassaasinnaasutaaq ulluinnarni inuunermikkut aammattaaq nukittuut. Upperisarsiornikkut maanna ingerlanerput soqutiginarsarneroqqittariaqalerparput, maannami takusaannalersimavarput upperisaqarnerminnik tunuartitsisut, upperisarsioqatigiinnut allanut ilannguttut il.il. Tamakkuli namminneq inuttut aaliangerneri soorunami ataqqilluinnarpagut Atassummiit.

Maanna siunnersuuteqartup Oqaatsuni oqaluffiliortoqartariaqarneranik siunnersuuteqarnera assortoruminaappoq tapersersornaqalunilu.

Assiliarli iluitsoq uani isigisariaqarsorinarpoq maanna, tassami taannaannaangunangeqimmat maanna oqaluffeqarnikkut annertuumik aserfallassimanermik eqqugaasimasoq. Ukiormi aalisarneq pillugu isumasioqatigiinnerup Ilulissani ingerlanneqarnerani Ilimanaq tikipparput ataatsimiitsitaliamit angalanermiit, tassanilu takuarputtaa qaluffiata qanoq pisoqalisimatiginera suliassaatigilersimatigineralu.

Nalilersuinissallu annertuut inoqarfippassuarni annerni minnernilu ingerlanneqassappata ilagiit sinniisaasa annertuumik peqataatinneqartariaqarnissaat pisariaqarpoq.

Taamaattumillu Atassummiit taamannak oqaaseqarluta Naalakkersuisut allannguutissatut siunnersuutaat toqqaannartumik taperserparput.